

03 IUNIE
RUGĂCIUNEA
SF.PREOT-MUCENIC
MIHAIL MARKOV DE LA GORETOVO
Молитва сщмч. Михаилу Маркову

О, славный Михаиле, добрый пастырю и истинный свидетелю Христов! К тебе яко ходатаю теплomu и поручителю верному пред Господем о нас, недостойных, прибегаем с упованием и молимся с любовью.

Ты от юности избрал еси учение духовное, да послужиши наставником и пастырем народу твоему: и ныне юных к вере истинней приведи, во благом учении настави и утверди, да страхом Божиим, хранением заповедей святых и духовным разумом отразят соблазны и поборют страсти от злых обычаев мира, похотей плоти и исконнаго врага диавола навеваемыя.

Ты на долзе времени, паки и среди мрака безбожия олтарю Святыя Троицы неленостно служил еси: тако и новей пастве твоей невреждение от духа века сего, свободу от недуга пианства, паче же в малем доброделании терпение у Господа испроси.

Ты во испытаниих, тя постигших, радостно проразумевал еси волю Божию, благую и совершенную, паки и славу, хотящую явитися

во страданиях временных: и нас, в болезнях, скорбех и обстояниях сущих, добрым упованием огради, паче же славословием Творца всяческих души наша исполни.

Ты в лютую годину гонений противу закрытия церквей Божиих до конца мужественно стоял еси, паче же и в лютейшее лето на возсозидание обветшавшаго храма дерзнул еси: и нас благослови храм, в немже ты святых молитвы многолетне возносил еси, мирне и благополучне возсоздати и благоукрасити в память твою.

Ты сугубое поприще заточений и изгнания за Христа прошел еси, паки и блаженные кончины праведника удостоился еси: умоли Господа и нам многоскорбное поприще земнаго жития благодушне прейти, паче же и непостыдные христианския кончины сподобитися, да вкупе с тобою, новомучениками Российскими и всеми святыми прославим Всесвятую Троицу и усердное Пречистых заступление в безконечныя веки веков. Аминь.